

E CAMPEON

DI ARUBA

E equipo di ping pong di Brazil, e aña aki a bira campeon den e categoria mas halto di division masculino. Aña pasá e equipo joven aki, consistiendo di Franklin Lopes, mihor conoci como "fef"; Diobanis Infanzon y Juan van der Linden, m mihor conoci como "njajo", a menasa fuertemente, ganando den preliminar nan facilmente di e equipo campeon Don Bosco, pero no tawatin suerte na nan banda.

Considerando cu e muchanan di Brazil mester practicá nan deporte preferí bao di circunstancia nan inadecuado, un klaslokal di Michael School, ta haci nan titulo di campeon di Aruba bal hopi mas. Tur hende por practicá un deporte, pero pa jega na e top di un deporte ta indispensable un perseverancia den training y diciplina. Y esaki sigur por wordo bisa di nos hungadornan.

Brazil Table Tennis Club (Brazil T.T.C) a wordu fundá na aña 1970 pa Sr. Jerry Gomes, kende den su hubentud tambe a practica ping pong. Na aña 1961, hungando pa club Don Bosco di San Nicolaas, el a bira campeon di Junioren y den e calidad ei a representa Aruba na Baranquilla, Colombia den e Campeonato Sud-Americano y del Caribe.

Na aña 1970, trahando na Michael School el a cuminsa train algun alumno di dje, tur muchanan di Brazil. Esakinan tabata: Junior Zaraga, Alberto Laveist, Claudio Kock, Franklin Lopes y Roberto Lake. Despues di algun aña e club tin awor alrededor di 25 miembro. Esunnan mas bieuw di 19 aña y e mas jong nan di 9 aña. Mester menciona cu gracias na gran esfuerzo di Sr. Albert Kock y Sra. Anna van der Linden nos a haya un tremendo ajudo financiero pa nos club, pa parti di Bohama N.V. cu a sponser nos 2 aña sigui. Den nos club tin ja diferente figuranan deportivo cu a destaca individualmente den diferente torneonan. Prueba di esaki ta e bunita trofeonan y medailles cu ta lombra den nan cas.

Maximo hungador di Brasil T.T.C. ta Franklin Lopes. Na 1973 Franklin a representa Aruba na Peking, China y na 1975 el a bai te Nigeria Afrika pa defende colornan di Aruba. Tambe el a participa na torneonan na Venezuela, Puerto Rico, Jamaica y Cuba.

Nos di dos hungador di Diobanis Infanzon dos ultimo añanan campeon di interscholair tafeltennis kampioenschappen dem su categoria. Na aña 1975 Diobanis (17 aña), den junioren (te ku 17 aña) a sali campeon di Aruba. Ojala e por logra e hazaña e aña aki atrobe. El a representa Aruba na



Venezuela, Colombia, Corsow y Cuba.

Juan van der Linden (15 aña) ya pa tres aña consecutivo ta campeon di schoolkampioenschappen. Njajo, manera e ta wordo jama, a gana entre otro na 1975 copa Juliana Junioren y a hunga na Colombia, Puerto Rico, Corsow i Cuba. E ta un di nos mihor prospectonan pa futuro.

Otro hungador cu a destaca hopi ta Eric Maduro cu a conquista varios bunita trofeos.

Alberto Albertsz, a hunga na Corsow, Puerto Rico y Cuba, y si e sigui train cu constancia e lo jega hopi leew den mundo di ping pong.

Dos di nos hungadornan jong cu tambe merece elogio ta Jerry Papito Pellegrin (13 aña) cu a logra varios campeonato caba den categoria di Kadetten (te cu 12 aña) y Ronnie Ras (14 aña) cu ta biraando un di nos mihor hungadornan.

Kenry Solognier y Hector Henriette ta dos hungador nobo cu tambe ta train duro pa bira top hungador. Francis Trimon (13 aña) tambe a lusi hopi den su grupo.

Di e mucha muhernan nos tin di bisa cu tin 4 cu ta train activo. Nan ta: Rosa Maduro, Susy Kock, Synia Reyes y Esther Ruiz. Cuatro hungador cu no a alcanza e nivel di hoofdklasse ainda pero ta superando cada bes mas. Ta un deseo grandi di Brazil T.T.C. pa tin un edificio adecuado pa nan train y pesei nan lo aplaudi si e edificio di Centró di Bario Brazil bin cla.